

# याकोब

## याकोब लिहि कीता चिटि

### बगा बतल मंता

बरोसा अनि बुदि-गियन	1:2-8
गरिब अनि दनेवंतल	1:9-11
करब गुन्क बगवंतनल वायोड	1:12-18
सते गोस्टितुन केन्चि अद गोस्टि तीर काम किय्वल	1:19-27
चुडुर-पांदे सूडवा	2:1-13
बरोसा अनि काम कीसि तोहबल	2:14-26
मीवा जरबने मनल वेन्जेडुन करुसट	3:1-12
बुदि-गियन वालिर	3:13-18
बगवंतन करुम वरट	4:1-12
डगुक डगुक गोस्टिड पोडि कीसि वेहमट	4:13-17
दनेवंतलिरकुन दाक सिय्वल	5:1-6
सम्दोतुन वोर्चि मुने दायना	5:7-20

**1** बगवंतल अनि येसु किरिस्तु पर्बुनोर सेव्कल याकोब्ना आंदुन. दुनिया पूरो पग्रे मासि मंवलिर बगवंतनुर बक्तलिर्कुन\* दंडोस दोसि, इद चिटि लिहि कीसेर मंतोन.

### बरोसा अनि बुदि-गियन

2-3 नावुर दादलिर-बायिकिन्ट! मीकुन तक्लिब्क अनि दुक्सड वातेके गिर मिरट वेले आनंद्ने मट. बरोसते अव तक्लिब्क अनि दुक्सन मेय्सि मुने सोत्तेके, मीकुन उंडे इचुर वोर्च्वल गुन अब्बंता इन्जेर मीकुन टावये. 4 मिरट वोर्च्वल गुंतगा बडे मासि गट आतेकेन, चोकोटे बरोसतगा गट आसेर बे-कसुर वालिर आया परंतिट.

5 मिहगटल बोने बुदि-गियन सेल्वेके वोर बगवंतन कोरना. अहन कोर्तोर वोन, राडि सिय्वकने कोर्ततुन तेर अदिक सिय्वल बगवंतल आंदुर. 6 बति बगवंतन कोर्नेके, सींतोरो सियोरो इन्जेर अनुमानम्ना बरोसते तल्कमट. अनुमानम्ने तल्क्वल सम्दुर्तड हेल्वड बहन वडिदे तेदंतडो अहन मंदंतोर. 7-8 आतोर रंड तीकर्ने सोन्च किय्वल मायनल तंवा सर्दगा बस्केन बरोबर ताका परोर. अदेन साटि पर्बुनगटल तनकुन उंडे बतय पुट्मड मंदर इन्जेर आतोर आसा किय्वा.

### गरिब अनि दनेवंतल

9 गरिब बक्तलिर तमकुन बगवंतल सीता डगुर-पांदुन पिय्सि, आनंद्ने मंदा लागर. 10 बति दनेवंतलिर बक्तलिर तमकुन बगवंतल सीता चुडुर-पांदुन पिय्सि, आनंद्ने मंदा लागर. बारितेके वूर गिर जाडिता पुडुन दात साया लागर. 11 पोड्द ऐसियंता, अद येदिते जाडि वतंता इंवल माकुन टावये. जाडि पुडडा सोबता रूप करब आंता. अह्ने दनेवंतलिर बक्तलिर गिर तम्वड काम्क कीसेर, मनेकेन नासेडम आंतेर.

### करब गुन्क बगवंतनल वायोड

12 दुक्सड वानेके अवेन वोर्चि मेय्सि, मुने सोंवलिर बक्तलिर आसिर्वाद येतंतेर. तनकुन पेर्मा किय्वलिरकुन बगवंतल वाग्दन सीतोर अद जीवता किरिट\* दुक्सड वानेके, बरोसतगा गट निल्तुरकुन पुटंता. 13 बोनय आयि कसुर कियन साटि मन वित्तेके, बगवंतले नावा मंदुन वितुसेर मंतोर इन्जेर इंवा. बारितेके बगवंतल तंवा मंदुन कसुर कियन साटि वितुसोर अनि मीवा मंदुन आतल बुदि पुटुसोर. 14 बति हर मायनल तंवा कसुर कियना इंवल बुदिते, नियतुन बहके मासि करब्ना आसतगा कोडे मांतोर. 15 आतल करब्ना आसा पिंडमुन दात

\* 1:1 बगवंतनुर बक्तलिरकुन इतेके, बारा कांदनुर यूदुल्क्ना जातितुर लोकुर इन्जेर ग्रीकु बासते मंता. \* 1:12 जीवता किरिट इतेके स्वर्गनगा बस्केट मंवल जीवा सेलेके मोक्सेम.

बडे मासि, पाप इंवडुन जल्मा सींता. अद पाप बेर्सनचोर बेर्सि, आत्मता सावदुन जल्मा सींता.

<sup>16</sup>नावुर लाइनुर दादलिर-बायिक्निट! मिरट पसे मायमट. <sup>17</sup>हर उंदि चोकोट्ना अनि पूरो बर्पुर वाले वस्तु, स्वर्गनगा मंवल बगवंतल वासेर मंता. वोरे बाबो हाबडगा वेड्चि सिय्वलिकुन निव्हिड कीतोर. अब वस्तुना वेड्चिते दड्मि मारियंता, बति बगवंतल बस्केट्के मारियोर. <sup>18</sup>बगवंतल तंवा सते गोस्टितुन हिंदल तना निव्हिड कीता कलितगा मरट पंटता मोदोडा ईसतुन दात\* मंदना इन्जेर मिय्तोर.

### सते गोस्टितुन केन्चि अद गोस्टि तीर काम किय्वल

<sup>19</sup>नावुर लाइनुर दादलिर-बायिक्निट! इद गोस्टितुन करि कीम्ट. हर मायनल केन्ज्ले तयर मंदना अनि वड्कनेके सोन्च कीसि जोक्सि वड्कना. वेणे सोडुन वाय्वा. <sup>20</sup>बारितेके मायनना सोड बगवंतल इचा किय्वल, नियत्ना सरि ताकुसा परो. <sup>21</sup>अदेन साटिने मिह्गा मंवल करब-पांदुन अनि बगड-नियतुन सुटि कीसि ताकट. मीवा मन-दिलतुन रोपो बगवंतल इर्ता अद गोस्टितुन पिय्सि ताकट. इद गोस्टि मीकुन बचि किया परंता.

<sup>22</sup>बगवंतना वचन सिरिप केन्ज्वले आयो बति, अद वचन वेह्ता तीर ताकना. अहन ताक्वेके मीवा मिरट मोसेम कीतुर आंतिट. <sup>23-24</sup>बगवंतना गोस्टि केन्चि, अद गोस्टि तीर कियोर वोर मायनल आर्सतगा तंवा मोकोम सूड्सि, तना बहन मंतोरो इंवल बहिर सोन्जि, येंटने मरुड्वन दात मंदंतोर. <sup>25</sup>बति बगवंतना वचंतुन दिहंते सूडतेके तान्गा बतय कमि सेले. पर्जतुन अद मोकडो सुटि कियुसा परंता. अदेन साटि बोर्ते मायनल अद वचंतुन केन्चि, अद वेह्ता तीर कीतोरो, अद वचंतुन वोर बस्केन मन्गोर. बति अद वेह्ता तीर पिसंतोर. आतोर मायनल बद काम कीतेके गिर बगवंतल वोन आसिर्वाद सींतोर. <sup>26</sup>बोर्ते तंवा तनय बक्तना इन्जेर वेह्चेर, तंवा वेन्जेडुन जरब्बे इरा परोरो, वोर तंवा तनकुन मोसेम किय्वल आंतोर. वोना बक्ति बततुने कामि सियो. <sup>27</sup>रांडे वेय्लोकुन अनि पोसटि मरि-मियडुन तक्लिब मनेके, वूरकुन मदत किय्वल बक्तितुने बगवंतल कोसेर मंतोर. अहने इद दुनियता पाप तनकुन तुंड्वक्ने सुदुड मंवल बक्तितुन गिर बगवंतल कोसेर मंतोर. इहिन कलित सेलवक्ने मंवल बक्तिये करल बक्ति आंद.

### चुडुर-पांदे सूड्वा

**2** नावुर दादलिर-बायिक्निट! मय्मते जगा जगा मिड्चेर मंवल, येसु किरिस्तु पर्बुन पोरो बरोसा इर्वलिर मिरट, बोने बेद-बाव्ते सूड्मट. <sup>2</sup>नमुनतुन वोरोर मायनल सोनेतड़ मुदड अनि बारितड कप्पिड केर्सि अनि उंडे वोरोर माक्डे मातड कप्पिड केर्सि, मिरट मीरे माय्वल रोतगा वातेर इटु. <sup>3-4</sup>अस्के मिरट बारितड कप्पिड केर्सि सजे मासि वातोन सडा, “दादा! निमे इद चोकोट्ना कुर्सितगा उदा” इन्जेर वेह्चि, गरिबुन सडा, “निमे अगा निला सेलेके इगे बूड उदा” इन्जेर वेह्तेके, मिरट बेद-बाव तोह्चि, करब बुदिते तस्वा कीतुर आंतिट.

<sup>5</sup>नावुर लाइनुर दादलिर-बायिक्निट! इद गोस्टि केन्ज्ट. इदेन मुनेन तनकुन पेर्मते बक्ति किय्वलिरकुन तंवा राज सींतोन इन्जेर बगवंतल वाग्दन सीतोर. अदेन साटि बगवंतले दुनियतुरा नदुडुन मुने गरिब मंवलिरकुन बरोसतगा दनेवंतलिर कीतोर. अनि वोरे तंवा राजा ईसा येतना इन्जेर वूरकुन नेमि कीतोर. <sup>6</sup>मिरट वीर गरिब लोकुरा हिजत वोसेर मंतिट. बति मी पोरो अदिकार ताकुसेर, मीकुन कोट्कनगा\* हव्लि किय्वलिर वीर दनेवंतलिरे आंदिर कि आयुर? ओहो, वीरे आंदिर! <sup>7</sup>मिरट बक्ति किय्वल किरिस्तुना चोकोट्ना पोरोडुन रेह्चि वड्कवलिर वीरे दनेवंतलिर आंदिर कि आयुर? ओहो, वीरे आंदिर!

<sup>8</sup>“नीवा नीकुन पेर्मा कीतपे नी आजु-बाजुतुरकुन गिर पेर्मा कियना” इंवल दर्मा-ग्रन्त्ना मुके हुकुमुन मिरट पिय्सि ताक्केके, अद चोकोट्नय गोस्टि आंद. <sup>9</sup>बति उंदि मोका मिरट बेद-बाव तोह्चिक्टे, दर्मता कानुंतड हुकुमकुन पिय्सि बय्मन आसि पापिर आंतिट. <sup>10</sup>बारितेके बोरे आयि अद कानुंतगा मंवलिक सम्दो हुकुमकुन पिय्सि ताक्केर, उंदि हुकुमुन टूटि कीसि ताक्केके गिर, वोर पूरो दर्मता कानुंतड हुकुमकुन पिय्सि ताक्मकि इंवल बद्नम आंतोर. <sup>11</sup>बारितेके “पीर किय्वा” इन्जेर वेह्तोर वोरे, “बोनय जीवा गिर येत्वा” इन्जेर वेह्तोर. अदेन साटि वोरोर मायनल पीर किय्वेके गिर उंदि मोका बोनय जीवा येत्तेके, वोर अद कानुंतड हुकुमकुन बय्मन आसि ताक्कोर आंतोर.

<sup>12</sup>अदेन साटि माकुन मोकडो सुटि किय्वल कानुंतुन पिय्सि, वड्क्ततुन हिंदल अनि काम कीततुन हिंदल बगवंतल तस्वा किय्वल मंतोर इन्जेर दिहंते ताकना. <sup>13</sup>बारितेके दुसुर पोरो

\* 1:18 यूदुल्क पंडुस्ता पंटता मोदोडा ईसा बगवंतनय आंद.

\* 2:6 सेलेके पन्चद्वनगा.

दया तोहुर वूरकुन बगवंतल तस्वा कीनेके, वूर पोरो गिर दया तोहोर. बति बूर्ते दुसुर पोरो दया तोहंतेरो, बगवंतल तस्वा कियन नेटि वूर वेले संतोस अनि आनंदने मंदंतेर.

### बरोसा अनि काम कीसि तोहवल

<sup>14</sup>नावुर दादलिर-बायिकिनट! “नाकुन येसु किरिसतुन पोरो बरोसा मंता” इन्जेर वोरोर मायनल वेहतोर इंटु बति, अद बरोसा मत्ता तीर काम किय्वेके, आतल बरोसा बततुने कामि सियो. आतल बरोसा मायनन बचि किया परंता कि बतल? बचि किया परो. <sup>15</sup>नमुनतुन वोरोर दादले आयि, सेलेके उंदि बायिय आयि, तिले तिंडि सेल्वक सेलेके, पोंडले कप्पिड लेले कप्पिड मत्तेर इंट. <sup>16</sup>अस्के मिरट वोर दादन सेलेके, अद बायिन बतय मदत किय्वक्ने, वूर सडा, “सांतिते सोन्जि, पेटिमेन तिंटु अनि मेंदोल-मेन कप्पिड पोंडट. अस्के मीकुन गर्मि वांता. इव सम्दो मीकुन बगवंतल सींतोर” इन्जेर सिरिप गोस्टिनेन वेहतेके बतय पायदा पुटो. <sup>17</sup>अदे तीर्दे बरोसा मंता इन्जेर वेह्विच, बरोसा मत्ता तीर काम किय्वेके गिर आतल बरोसा वोंटरि आसि सांता.

<sup>18</sup>बति नमुनतुन बोरे ना सडा, «नाकुन येसुन पोरो बरोसा मंत» इंदनुर्ते, अस्के नना, «नावा बरोसतुन चोकोट्नड काप्क कीसि तोहंतोन्» इन्जेर वोन वेह्विच, «नीवा बरोसतुन काम किय्वक्ने तोहा पर्कि कि बतल?» इन्जेर पूसि कींतोन. <sup>19</sup>बगवंतल वोरोरे मंतोर इन्जेर निमे बरोसा किय्वल चोकोटे बति, बतल पायदा? अहन बूर्तक गिरे बरोसा कीसेर, वेरिसि तरा तरा आसेर मंतड.

<sup>20</sup>एहे पिसटि! काम कीसि तोहवक्ने मंवल बरोसा बततुने कामि सियो इंवडुन गवा पहजे कि बतल? <sup>21</sup>मा तोन्तोर बाबो अब्राहमुन हेतु कीम. वोर तंवोर मरि इसकुन बलिदान सिय्वल बोव्लत पोरो बलि सिय्ले आनेकेते, बगवंतल वोना कार्यतुन सूडसि, वोन नियत्नोर इन्जेर वोसोर कि सेले? <sup>22</sup>वोना बरोसतुन केय्दे कीसि तोहवल मिरट करि कीतिट कि सेले? वोर तंवा बरोसा बातल इंवल केय्दे तोहतोर. <sup>23</sup>“अब्राहम बगवंतन पोरो बरोसा इर्तोर. अदेन हिंदले वोन नियत्नोर इन्जि बगवंतल वोसोर” इंवल दर्मा-ग्रंत्ना वचन पूरे माता. अद तरिकते अब्राहमुन बगवंतनोर सोम्पल इंवल पोरोल वाता. <sup>24</sup>इद सूडसि, मायनल सिरिप तंवा बरोसतुन हिंदल आयो बति, तंवड कामकुन हिंदले, नियत्नोर इन्जेर बगवंतल वोसोर इंवल मिरट करि कींतिट.

<sup>25</sup>अदे तीर्दे, राहबु<sup>#</sup> इंवल लन्जे वेय्लो इज्जयेल देसुर कब्रियलिरकुन तंवा रोन मकुसि, सम्दो मान-मर्यदा कीसि दुसो सरिय सारि कीता. अद चोकोट्ना कामुन हिंदल, «नियत्ना वेय्लो» इन्जेर बगवंतल वोसोर. <sup>26</sup>बहंते परन सेले अद मेंदोल साता लेकते वांतयो, अहने चोकोट्ना काम कीसि तोहुर वूर बरोसा गिरे साता लेकतेन वांता.

### मीवा वेन्जेडुन जरब्ने मनल करुसट

**3** नावुर दादलिर-बायिकिनट! मिहगटल वेलेटिर बोदा वेह्वलिर आयमट. बारितेके बोदा वेह्वलिर माकुन वेले कटिता तस्वा मंदंता इंवल मीकुन टावये. <sup>2</sup>मरट सम्मिर गिरे बचोडो गल्लिड कींतट. तना वङ्क्वलिक गोस्टिनगा उंदि गिर तप कियोर वोर बर्पुर गुन वाले मायनल आंतोर. आतोर मायनल तंवा पूरो मेंदोडुन जरब्ने इरा परंतोर. <sup>3</sup>मरट ताकुस्ता तीर ताकना अनि मावा जरब्ने मंदना इन्जेरेते कोंदन\* वेसुनि दोहंतट. <sup>4</sup>अहने डगुर रूकता नमुना येतेके गिर, बेय जोर्ते वडि वासि तान दुर्सेर वोंता. बति तान ताकुस्वल मायनल अद रूकतुन पेजे मंवल चुडुसि कटेतुन\* तिरुस्तेके, तना बेके सोंदना इतेके हके तान मलुसा परंतोर. <sup>5</sup>अहने वेन्जेर मावा मेंदोडगा चुडुसि बागम आंद. बति अद बेय डगुक डगुक गोस्टिड वडकंता. अदे तीर्दे, चुडुसि मिन्गुल डगुर केडतुन बचोर-बहन डुंडुसंतयो सोन्च कीम्ट.

<sup>6</sup>मावा वेन्जेर गिरे उंदि तड्मित दात्नय आंद. करब्ने निन्चि मंवल मावा मेंदोडगा उंदि बागम आसि मंता. अद वेन्जेर करबुन पूरो मेंदोडगा पग्नि कीसि, मायनना जिन्गनितुन तड्मित दात लावि कींता. अहन लावि किय्वल सक्तितुन अद वेन्जेर पातड्तल\* येतंता. <sup>7</sup>सम्दि जंवरकुन, पिटे-पुरुडुन, पुर्ग-बुसितुन, सम्दुरतगा मंवलिक जिव्रस सम्दोतुन इदेन मुने अनि इके गिर मायनल जरब्ने इसेरेन मंतोर. <sup>8</sup>बति वेन्जेडुन इके वेरि बोरे तंवा जरब्ने इरा पर्मकि. अद वेन्जेर जीवा तेंड्वल विकने निन्चि अविवकने करब कीसेरेन मंदंता.

<sup>9</sup>इद वेन्जेडेन मरट पर्बु आय्वल बाबो बगवंतन डगुर-पान सींतट. इदे वेन्जेडे बगवंतना रूप्जे पुट्तोर मायनन सापेना सींतट. <sup>10</sup>आसिर्वाद अनि सापेना उंदिय तोड्दल बहिर वासेर मंतड. नावुर दादलिर-बायिकिनट! अहन मरट मंवा. <sup>11</sup>सोवोर येर अनि चोकोट्ना येर बस्केट्के उंदि जलतल पूटे मायोड. <sup>12</sup>नावुर दादलिर-बायिकिनट! अन्जुरि मरतुन मर्का पंडिड\* बस्केट्के सादोड. अहने आडुर वेलितुन अन्जुरि

\* 3:3 ग्रीक बासते इहिन लिहि कीसि मंता: कोडता मुस्कुरितुन लगम दोहंतट. \* 3:12 ग्रीक बासते ओलिवा पंडिड इन्जेर मंता.

# 2:25 येहोसुवा 2:11

\* 3:4 तेलुगुते अद चुडुसि कटेतुन «चुक्कानि» इंतेर.

\* 3:6 पातड्तल

पंडिड बस्केटके सादोड. अदे तरिकते, सोवोर येता जलतल चोकोट्ना येर पूटे मायो.

### बुदि-गियन वालिर

<sup>13</sup> बुदि-गियन वालिर अनि समजदार्क मी रोपो बोरे मंतेर कि? अहन मत्तेके वूर सते-पांदे ताक्सेर, बुदि-गियन सीता अद चुडुर-पांदुन पिय्सि, वूरड कार्यन तोहट इंट. <sup>14</sup> उंदि मोका मीवा दिलतगा कुटा कुटा अनि लाल्सल गुंते मन्जि, डगुक डगुक गोस्टिड वेहचेर सतुन मकुसिय्मट. <sup>15</sup> मिह्गा मंवल ईतल बुदि-गियन स्वर्गनल रेय्सि वायमकि. इद मीकुन दुनियतल वाता बुदि-गियन आंद. ईतडगा बाव-बक्ति सेले. इद सय्तंदा बुदि-गियन आंद. <sup>16</sup> बहन इत्तेके बगते कुटा कुटा अनि लाल्सलिक गुन्क मंदंतडो, अगा जगडड लोलिड अनि सम्दो तीक्कंड करब काम्क मंदंतड.

<sup>17</sup> बति स्वर्गनल वाय्वल बुदि-गियन वेले पवित्रा आंद. अद बुदि-गियन सांतितुन पेर्मा कींता. अद बोने बतय इंवक सादु आसि मंदंता. अद बुदि-गियन वेहता तीर केन्जंता अनि दयते सूडंता. अनि अद चोकोट्नड काम्क कीसेर बेद-बाव तोहवक मंदंता. अद बुदि-गियन सतेमुन पिय्सि ताकंता. <sup>18</sup> सते-पांदे अनि सांतिते ताक्वलिर अद विजतुन वीच्चि, सत्ना अनि सांतिता पंटतुन कोयंतेर.

### बगवंतन करुम वरट

**4** मिह्गा जगडड अनि लडेयक बततुन हिंदल जगर्सेर मंतड? मीवा दिलतगा पुट्वलिक आसन उंदितुन उंदि असि वाय्वा सोन्जिने इव जगर्सेर मंतड. <sup>2</sup> मिरट आसा कीकिट बति, अद मीकुन पुटो. अद कुटा कुटा गुंता आसतुन साटि माय्हन जकंतिट. जगडड अनि लडेयक कींतिट बति, आसा कीकिट अद मीकुन पुटो. मिरट कोर्ता अद मिह्गा मनो. बारितेके बगवंतन मिरट तल्किवट. <sup>3</sup> मिरट बगवंतन तल्केके गिरे अद मीकुन पुटो. बारितेके मीवा सुक-बोगुन साटि कर्चि किय्ले करब्ना आसते तल्कंतिट.

<sup>4</sup> इद दुनियतड सुक-बोगुन सडा दोस्तन कीतेके, बगवंतन पेर्मा कीतप आयो बति, पीर कीतप आंता इंवल टावा सेले कि बतल? इद दुनियतुर सडा दोस्तन कीका इंवल, बगवंतन पगा-दारल आंतोर. <sup>5</sup> “बगवंतल मा सम्दिरकुन सीता, अद आत्मते मरट तंबय बक्ति कियना” इन्जेर दर्मा-ग्रंत्नगा, वटि आगमे लिहि कीसि मंता इंतिट कि बतल? <sup>6</sup> बगवंतल माकुन वेले पेर्मता-दयते सूड्सेर मंतोर. अदेन साटिने दर्मा-ग्रंत्नगा, “बगवंतल गर्वते मंवलिरकुन उल्टा तिरियंतोर.

बति कमि-पांदे मंवलिर पोरो पेर्मता-दया तोहंतोर”# इन्जेर लिहि कीसि मंता.

<sup>7</sup> अदेन साटि, बगवंतन मुने चुडुर-पान कीसि मंट. सय्तंदुन उल्टा तिरियट. अस्के वोर सय्तन मिह्गटल परर आंतोर. <sup>8</sup> बगवंतन करुम वरट. अस्के बगवंतल मी करुम वांतोर. पापेस्तलिर्निट! मीवड पापकुन नोरट. बहके मातुर्निट! मीवड दिलकुन सुदुड-पान कीम्ट. <sup>9</sup> पापेस्तलिर्निट! विचर्ते अनि दुक्सते मंट. जोर्ते आडट. कव्वडुन बद्लि आड्सेर अनि आनंदुन बद्लि दुक्सते मंट. <sup>10</sup> पर्बुना नदुडुन मुने मीवा मिरट चुडुर-पान कीसि मंट. अस्के पर्बु मीकुन डगुर-पान सींतोर. <sup>11</sup> दादलिर-बायिक्निट! मीवा मिरट वोरोन वोरोर बय्मते राड्मट. तंवोर सोस्न राडि सीतेके आयि सेलेके वोन पोरो तस्वा कीतेके आयि, वोर मायनल दर्मता कानुंतुन बय्मन आतोना लेकते वांतोर. मीवा काम सिरिप अद कानुंतुन पिय्सि ताकना. अद कानुन चोकोट्ना सेलेके वायुट्ना इन्जेर तस्वा किय्वल मीकुन हक सेले. <sup>12</sup> पर्जतुन पोरो नायदा तस्वा किय्वल अनि दर्मता कानुंतगा हुकुम्क लिहि कियुस्वल वोरोरे बगवंतल आंदुर. पर्जतुन बचि किय्वल अनि नासेडम किय्वल गिर वोरे आंदुर. ते आजु-बाजुतुर पोरो सिक्सा वाटट इन्जेर वेह्ले नीकुन बोर अदिकार सीतोर?

### डगुक डगुक गोस्टिड वेह्मट

<sup>13</sup> केन्जट! “नेंड सेलेते नाडि बत्तेर उंदि चहर्दे सोन्जि, अगा उंदि साल वेरि मंदंतोम. वरट! अगा बेपरि कीसि कोतड वेले कमय कीकट” इन्जेर वेह्वलिर्निट करि कीम्ट. <sup>14</sup> नाडि बतल जर्गतयो मीकुन टावा सेले. मीवा जीवतुन बारेते सोन्च कीम्ट. मिरट जुलुक दिसि उंडे जुलुक्ने मयड आसि सोंवल, पोयता दुहरतुन दात्नुर आंदिट. <sup>15</sup> अहन इंवडुन बद्लि मिरट, “पर्बु जीवते इर्तेके, इद कीकोम अद कीकोम” इन्जेर वेह्ना. <sup>16</sup> बति मिरट अहन किय्विट. लांडि-लबड डगुक डगुक गोस्टिड वेह्वेर गल्तिड कीतिट. <sup>17</sup> अदेन साटि चोकोट कियना इंवल, टावा मन्जि गिर चोकोट कियोर वोन पाप लागंता.

### दनेवंतलिरकुन दम्कि सिय्वल

**5** ये दनेवंतलिर्निट, केन्जट! मिरट दुक्सते आड्सेर किलियट. बारितेके मीकुन गाचर-गंडलक वाय्वलिक मंतड. <sup>2</sup> मीवा दन-दब्लत कडियंता अनि मीवड पाडुक वेलुम पियंतड. <sup>3</sup> मिह्गा मंवल सोने अनि कूरा चिलिम पियंता. अद चिलिम मी पोरो उल्टा गवा वेह्विच, मीवड मेंदोलकुन

तद्भवित दात डुंडुसंता. इव आक्रितड दिवोस्कने गिरे मिरट वेले दन-दब्ललत्ना डीग वाड्सेर मंतिट.<sup>4</sup> केन्जट! मी वहुकनगा काम किय्वलिर बूथतलिरकुन, मिरट बूति सिय्वकने पसि कीतिट. वूरड बूतिड मी पोरो पिरदि कीसेर मंतड. वूर बूथतलिरा आड्वल स्वर्गना दलम्नोर पर्बुनड<sup>\*</sup> केवकुन केन्जा वाता.<sup>5</sup> बोमित पोरो मीकुन पसंद वाता तीर सुक-बोगे पिसेर, कोय्वल दिनमुन साटि, मीवड दिलकुन कोडचुसि तयर कीसेर मंतिट.<sup>6</sup> मिरट नियन्ते ताक्वलिरकुन सिक्सा वाट्सि, वूरकुन जक्किट बति, वूर मीकुन मर्ला बड्मकि.

### सम्प्रदातुन वोर्चि मुने दायना

<sup>7</sup> अदेन साटि दादलिर-बायिक्निट! पर्बु मल्सि वानल वेरि, मिरट वोर्चि चोकोटे सूड्सेर मंट. बहन इत्तेके, बोरोर केतिदारल तंवा बोमितगा वाट्वल चोकोट्ना पंटतुन साटि, बहन सूड्सेर मंदंतोरो दिहंते करि कीम्ट. वोर केतिदारल मोदोडा पिर वासि<sup>\*</sup> पंटा पिरंता अगटल्ते बेर्सि, पंटा कोय्ले वानल वेरि वोर्चिकुन चोकोटे सूड्सेर मंदंतोर. <sup>8</sup> मिरट गिर मंदुन गट कीसि, वोर्चि सूड्सेर मंट. बारितेके पर्बुना मल्सि वाय्वल वकत करुम वासेर मंता. <sup>9</sup> नावुर दादलिर-बायिक्निट! वोरोन पोरो वोरोर चहिडड वेहमट. अहन वेहतुरकुन पर्बु सिक्सा वाटंतोर. केन्जट! वोर नायदा तस्वा किय्वल अदिकारि वेय्ने वाय्वल मंतोर.

<sup>10</sup> नावुर दादलिर-बायिक्निट! पर्बुन बारेते वेहतुर पर्वक्तलिर तक्लिब्क बोगे मातेर. वूर पर्वक्तलिरा नमुना येञ्चि मिरट ताकट. <sup>11</sup> तक्लिब्क वोर्चि बरोसते ताक्तुरकुन आसिर्वाद येत्तुर इंतट. योबुना वोर्च्वल गुंतुन बारेते केन्चि मंतिट. पर्बु वोन आक्रित बातल इनम सीतोर इंवल मिरट सूड्तिट. पर्बु वेले दया अनि किवुल वाले आंदुर. <sup>12</sup> नावुर दादलिर-बायिक्निट!

सम्मिन तेर मुके बतल इत्तेके, स्वर्गना पोरोडेन आयि, बोमिता पोरोडेन आयि, उंडे दुम्मो बततय पोरोडेन आयि, मिरट वोर वाट्वा. सिरिप बतल मंता अद वेहट. अहन मत्ता तीर वेहतेकेन बगवंतल मीकुन सिक्सा वाटोर.

<sup>13</sup> मिहगटल बोरे आयि तक्लिब्कनगा अर्सि मत्तेके, वोर पार्तना कियना. आनंद्ने मत्तोर वोर, बगवंतन पार्तना-विंति कीसेर पाटड वारना. <sup>14</sup> मिहगटल बोरे आयि येड्कि-दुक्ने मत्तेके, चर्चितुर पेदोलकुन वोर केयुसना. वूर वासि पर्बुना पोरोडे निय सोक्सि, वोन साटि पार्तना कियना. <sup>15</sup> अहन बरोसते वूर पार्तना कीतेके, वोर दुकेलल चोकोट आंतोर. पर्बु वोन चोकोट कींतोर. उंदि मोका वोर पाप्क कीसि मत्तेके, वोनड पापकुन पर्बु मापि कींतोर. <sup>16</sup> अदेन साटि बवे पाप्क कीसि मन्किट्टे, बोनड वोहक पाप्क मी नड्हुम मिरट वोपट अनि वोरोन साटि वोरोर पार्तना कीम्ट. इदेन हिंदल, मीवा तबियत चोकोट आंता. नियन्तोना पार्तना वेले सक्तिते मन्जि बचोरो चोकोट किया परंता.

<sup>17</sup> येलियल मा दात्नोरे सादरन मायनल आंदुर. पिर अर्वा इन्जेर तंवा मंदे पार्तना कींतोर. ते सडे मूंद साल्क वेरि, बोमित पोरो पिर अर्मकि. <sup>18</sup> अद आता पेजे पिर अरना इन्जेर मर्ला पार्तना कींतोर. अस्के हाबर पिरदुन अरुस्ता अनि बोमि तन्गा उस्तड पंटड पंडुस्ता.

<sup>19</sup> नावुर दादलिर-बायिक्निट! मिहगटल बोरे आयि सते सरदुन बहके मातेके, वोन मल्सि सत्नगा तत्तेके इद गोस्टितुन करि कीम्ट. <sup>20</sup> पापेस्तन पाज्ञा सरितल सते सर्दे मलुस्तोर वोर, पापिना आत्मतुन मरंतल तपुसि, बचि कियुस्तोर आंतोर. इदे आय्वा पापिनड पापकुन बगवंतना केय्दे वोर मापि कियुस्तोर आंतोर.

\* 5:4 स्वर्गना दलम्नोर पर्बुनड इत्तेके सक्ति वाले बगवंतल.

\* 5:7 अद जागतगा उर्सन वकत्ने जरसि पिर वांता अनि पंटा कोयन मुने बेय पिर वांता.